



Minggu, 13 Desember 2020

Kej. 18:1-5 bdk. Luk. 2:1-7



NGALO-NGALO TEMUE



Lit kuan-kuan i bas bahasa Indonesia, ‘tamu adalah raja,’ nuriken maka nandangi temue e ilakoken simehulina, mehamat man bana alu nikapken kai siiperlukenna, subuk nakan pangan bagepe inganna lako pekesahken. La meros i bas nikapken keperlunna. Tradisi kalak Israel pe bage, adi lit temuena minter ialo-alona alu mehuli. Nina kalak Israel, adi lit temue reh ku rumahta maka lit pasu-pasu si nandangi sialoken, sebab temue e biasana maba pasu-pasu. Banci saja kai pe labo ibereken temue e man banta tapi Dibata si mereken pasu-pasu man kalak si ngalongo ngalo temuena alu mehuli. Abraham pernah ngalo-ngalo temuena si singgah ku kemahna. Mis isikapkenna lau guna murihi nahe temue e, emaka ibabana ku kemahna lako pekesahken, isikapkenna lau inemen ras pangan si entabeh man temue e, isikapkenna ka pe pangan guna temuena e i bas perdalanen. Sada keriahen kal adi banci ngelai temuena, emaka ilakokenna si e kerina alu ermeriah ukur. Iingetna maka ia pe megati i bas perdalanen si ndauh, megati keberngin i kuta kalak, mehuli kalak man bana, la iganggu perdalinnenna emaka rutang pusuhna erbahan mehuli man kalak si kesilang ku rumahna.

Si bandingkan ras simada rumah siingani Jusup ras Maria tupung ia duana bas perdalanen si ndauh nari. Sura-surana ikut isensus, erkiteken bage anjuren pemerintah paksa si e. Pemilik penginapen ngidah situasi Maria si paksa e sangana natang tuah, la akapna mungkin Maria itama i ruang tamu atas sebab enggo dem temue si deban. Pasti Maria perlu ruang si aman ras nyaman guna bersalin, emaka iusulkenna Maria ras Jusup i ruang lantai bawah rumahna. Ruangen e labo semal ipake, apaika guna ngalo-ngalo temue. Tapi rikutken situasi Maria, lanai akapna lit ingan si deban si banci jadi inganna bersalin. Siidah simada rumah e rusaha lako nikapken ingan man Maria ras Jusuf. Labo itulakna bage-bage saja, bagi rusur si begi ras sideramaken tupung wari natal. Simada rumah e teridah nge ertanggungjawab bagi Abraham tupung ia ngalo-ngalo temuena. Asa gegeh ras kengasupenna enggo ibahanna si mehuli. Silakoken si mehuli man temue si reh ku rumahta.



Blank writing area with a wavy top edge.